



KHUTBA JUMMAH
HADHRAT MUHYI-UD-DIN AL-KHALIFATULLAH
MUNIR AHMAD AZIM

20 Septembre 2019
20 Muharram 1441 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor : **AL-HUJURAT : GHIBBAT (PARTIE 2)**

Par la grâce d'Allah, Allah (swt) fine donne moi le *Tawfiq* pour continuer lor mo Khutba Jummah ki mo ti commencer lors « *Ghibbat* » la semaine dernière. Sa li ene sujet très important pour nous bane membres du Jamaat Ul Sahih Al Islam et le monde musulman en général.

Kan nous guette différents Hadiths lors « *Ghibbat* », nous arrive à ene seul conclusion ki « *Ghibbat* » c'est ki kan ou conne défaut ene dimoune ou sois ou fouiller pour conner et ler ou conner, ou fanne sa avec l'intention pour humilier et abaisse sa dimoune là devant lizié les autres. Ena sa bane qualité dimounes là ki kan zot trouve dimounes fine rassembler ensemble, lerala li, li pou dire intel so défaut devant les autres dimounes, seulement avec l'intension pour humilier et abaisse li, et ki les autres dimounes alle conne défaut ou faiblesse sa dimoune là et zot gagne ene dégoût pour sa dimoune là et éloigner avec li ou méfier sa dimoune là et l'autre là-là li gagne ene grand satisfaction, li prend ene plaisir avec sa pour dévoile et humilier sa dimoune là. Mais pour li, li pas pou guetter, ki kantité défaut li ena et ki compte li ena pou render ene jour devant so Créateur.

Par so jalousie et la haine ki li ena dans so le cœur, c'est sa ki faire li comporte li comme ene malfaiteur, ene imbécile. Astère ena ene lotte catégorie dimoune ki

cause défaut ene dimoune dans so l'absence, li prend plaisir là-dans. Kan dimoune là pas présent li cause toutes sortes kalité causer lor li. Kan li trouve ene groupe dimoune pé écoute li, li rabasser même parceki dimoune là pas présent pou réfute li ou sois pou défanne so l'honneur.

Donc li ene très grand péché et en donnant sa l'exemple là, Allah (swt) dire dans Quran ki : « *Eski quelqu'un content mange la chair de cadavre de so frère ?* » Kan ou tanne sa même ou gagne ene dégoût contre sa. Ene *Momin* (croyant) gagne dégoût mais par contre ene imbécile, ki jaloux, ki ena la haine couma sa ex-so-called Amir et so bane Mullahs du Jamaat Ahmadiyya fine faire pendant nous l'absence, lors mimbar de Nabi Kareem (saws) dépi 2001 avec la Manifestation Divine, zot pas fine gagne aucaine dégoût. Au contraire zot fine mange nous la chair avec l'appétit couma bane cannibales.

Ici dans sa verset là, pé faire référence, kan ou pé cause contre ou frères, sœurs tous les jours ; pas seulement ou frères, sœurs de sang – et référence faire à bane croyants *Momin* – kan ou pé cause contre zot, bé en fait ou pé mange la chaire de zot cadavre et ou pé faire sa avec ene grand plaisir. Mais en ce qu'il s'agit de sa dimoune ki pé faire « *Ghibbat* » là so propre être, li penser ki : *Moi mo pé prend plaisir are sa. Moi mo pas pé gagne aucun dégoût pour mange la chair de cadavre de mo frère ou sœur. Ce qui veut dire ki mo l'angle de voir les choses même fine changer.* Sa l'angle ki sa dimoune ki pé faire « *Ghibbat* » là li complètement différent avec angle dans laquelle Allah guette sa bane choses là. Li pas non pli l'angle ki le prophète (saws) ti guette sa bane z'affaires là.

Donc li pas seulement ene maladie spirituelle, ene péché, mais li ena ene profonde manquement dans le caractère même de sa dimoune là, dans so lé goût même, et so reformation li comparativement pli difficile. Si ene dimoune li bien conscient et li fine bien comprend ki sa ene péché grave, bé sak fois li pou faire *Taubah* et li gagne ene remord et prend la décision ki li pas pou commette sa encore, définitivement Allah (swt) pou pardonne li et pou accorde li So grâce.

Mo capave dire ki beaucoup dimounes écrire moi et ena ki zoine moi aussi, mais zamais mo fine tende ene dimoune dire moi ki : *Mo fine faire « Ghibbat ».* Ena ki zot conner zot dans erreurs, et ensuite zot porte zot excuses et zot reconnaite zot erreurs, et zot essaye réforme zot et vine bane excellents croyants, mais seulement ena aussi la plupart ki persister, même si zot fine faire ene kitchose

grave ou ene erreur, mais zot persister pou donne zot même tous raisons, ki tous les temps zot ena raison. Et tous les temps par zot l'arrogance zot montrer ki c'est zot ki conne tous z'affaires et péna même sa humilité là dans zot pou accepter zot bane faiblesses, zot bane erreurs graves et pou dire : « *Faire duah pour moi ki Allah (swt) pardonne moi parceki mo fine commette ene très vilain chose devant lizié d'Allah.* » Sa kalité dimoune là penser ki kan li persister et montrer ki soi-disant li ena raison, ki sa pou faire bane dimounes ena l'impression ki li ena vraiment raison même, mais seulement sa dimoune là pas porte attention ki devant le Créateur c'est ene kitchose grave ki li fine commette et so conséquence vis-à-vis Allah pou bien grave.

Ene conseil : Vaux mieux accepter perdi dans sa le monde ici-bas là, mais so fruit pou bien doux dans *Aakhérat*. Nous humains, nous bien faible. Si nous fine commette ene vilain action coumsa, pas persister, ni montré ou l'arrogance plisse. Au contraire ou bizin faire beaucoup *duahs* ki Allah pardonne ou et protège ou contre le mauvais résultat de sa action là, ki ou fine commette là.

Parfois ou trouver ki pé faire « *Ghibbat* » lors untel et pé prend grand plaisir là-dans, et ene seul coup sa dimoune [ki zot pé faire « *Ghibbat* »] là rentre dans sa place là, et alor conversation changer ene seul coup et dimoune ki pé faire « *Ghibbat* » là, figure là déconcerter et faire tout pour couvert céki zot ti pé dire lor sa dimoune là et l'heure là li invente bane les autres causer jusqu'à li-même alle jusqu'à cause menti, li dire devant sa dimoune ki li ti pé faire « *Ghibbat* » lor li, avec ene figure déconcerter ki : *Mo ti pé dire ceci, mo ti pé dire cela.*

Et kan sa dimoune là fine aller ou sois zot trouve zot ene côté, bé zot gagne riyé, mais ene riyé de la honte, ene riyé déconcerter. Dans zot même, zot dire ki : *Azordi fine bien maille nous, sa dimoune ki nous ti pé causer là, ene seul coup li fine rentrer !* Zot bien conscient ki zot ti pé commette ene mauvais kitchose. Parfois ou pé cause de bonnes choses pou ene dimoune, pas pé faire « *Ghibbat* », mais ou conner dimoune là fine rentre ou sois li derrière ou, ou pas senti ou embarrasser ; au contraire ou pé cause sa dans ene façon et avec bon l'intention et ou pas pou gagne la honte même si dimoune là tender ; forcer ou capave présente li excuse si zamais ou fine blesse li dans ou pé causer, ou présente ou excuse, mais ou conner ou ki ou pas pé faire « *Ghibbat* ».

Kan cause menti clairement et ouvertement sa nous pas appelle « *Ghibbat* ». Ena ene zaffaire coumsa fine présenter devant Hazrat Muhammad (saws). Dans Muslim, Kitab-ul-Birr Hazrat Abu Huraira (ra) rapporter ki Hazrat Muhammad (saws) fine demander : « Eski zot conner « *Ghibbat* » ki été ? Bane Sahaba fine réponde ki : « Allah (swt) et So Rassool conne mieux. » Lerlà le Saint Prophète (saws) fine dire ki : « Le « *Ghibbat* » c'est kan ou cause ou frère derrière so le dos d'ene tel facon ki li pas ti pou content si li ti là. » Bane Sahaba fine demander ki si céki nous pé dire là li vrai et si nous pé dire sa dans so présence eski là aussi li pou « *Ghibbat* » même ? »

Le Saint Prophète (saws) fine dire si li ena sa défaut ki ou fine causer dans so l'absence là, bé li « *Ghibbat* ». Et si sa ki ou fine dire là li fausse, bé à ce moment là li ene allégation. Li ene blâme. Et sa li ene pli grand péché encore – (*mette toutes sortes kalité blâme lor ene dimoune sans ki capave prouve nannié. Mette blâme couma l'adultère etc. sans prouver par 4 témoins, et bane les autres fausses allégations pou humilier li*) – li ene péché tellement grave ki Quran fine prescrire ene punition bien sévère pour sa. Allah même bien encolère avec sa.

Donc, dans les deux cas péna aucaine raison ki ou commette ene tel zaffaire. Si li vrai li vine ene « *Ghibbat* » et si li ene mensonge bé lerlà li ene fausse allégation. Fausse allégation veut dire couma dire ou pé assassine quelqu'un. Dans le monde spirituel ene blâme li équivaut à ene crime, donc li ene péché de meurtre, li pas pli détestable ki mange la chair d'ene cadavre. Mais li encore beaucoup pli injuste ki sa. Et ou bizin ranne compte pou sa.

Alors sa sujet là li bien grand, aussi mais li ena ene signification bien directe aussi. Mais en céki concerne protection du niveau morale de la société, li ene sujet très important. Si ou pas fine comprend li et si ou pas fine accompli so droit, bé à ce moment là beaucoup de fois ou pou vine bane responsables ki fine sème la grain de la haine. L'heure là, li totalement ene hypocrisie pour mette bel pano « **L'amour pou tous et La Haine pou personne** », kan tandique ou fine fini sème la grain de la haine dans le cœur de bane dimounes ki dans le Jamaat et ene tel façon ki ou fine sème la haine là ki sa fine rentre aussi dans le cœur de la famille – blood relations, ene tel la haine ki fine filer, kot sa fine casse relation familiale et par sa la haine là, ou fine faire mette bane boycotte lors relation frères et sœurs et rentre dans la vie privée d'ene famille.

Pou lizié bane dimounes ou mette bane bel bel pano **'Love for all, Hatred for None'**, mais devant lizié d'Allah péna so utilité. Par ou propre action ou fine éloigne ou-même avec l'enseignement divine. Quel hypocrisie ! *Insha-Allah*, la semaine prochain pou continuer.

Alor, nous faire *duah* ki dans le Jamaat Ul Sahih Al Islam nous pas gagne bane dimounes coumsa, ki Allah pas faire même sa bane kalité dimounes là prospérer et filer aller même dans zot « *Ghibbat* », « *Tajassus* », jalousies, mensonges et blâmes. Au contraire, nous oulé ene Jamaat de bane *Muttaqi*, bane ki ena ene la crainte fort pou Allah dans zot les cœurs, dans nous les cœurs pour ki nous pas commette bane tel kitchoses ki pou faire Allah encolère avec nous.

Ki Allah faire bane dimounes ki intégrer le Jamaat Ul Sahih Al Islam travaille fort pour zot réforme. Nous pas oulé quantité, mais qualité ; bane bons croyants ki ouler réforme zot pou vine bane **SAHIH Mouslemeen** (croyants), et non pas bane ki intégrer la Manifestation Divine sans ki zot faire zéfforts pou réforme zot et pou vine sa vrai modèle ki Allah ouler ki zot vini là. *Ameen, Summa Ameen, Ya Rabbul Aalameen !*